

## EVAN ROBERTS TA "MANDA E SPIRITU SANTU AWOR"

### TEKSTO BÍBLIKO KLAVE

Ma boso lo risibí poder ora Spiritu Santu bin riba boso, i boso lo ta Mi testigunan na Jerusalèm i na henter Judea i Samaria, i te na e parti mas alehá di mundu. Echonan 1:8

Na kuminsamentu di añanan 1900 e nashon di Wales, parti di Reino Uní, tabata un lugá no masha sivilisá. E minamentu di karbon tabata un industriá importante, i e mineronan tabata hende brutu i duru, kustumbrá na idioma bulgar, konsumo di alkohòl eksesivó i asta e trato duru di e "pony di pos", e kabai ku tabata transportá karbon for di e mina te na e superfisie.

Evan Roberts, nasé na aña 1878, tabata yu di un minero, pero un kristian. Ora su tata a keda heridá den un aksidente den e mina, e hóben Evan a bira un alumno di e herero, pero e kurason di e mucha tabata den prediká e evangelio.

No tin un fecha ku por spesifiká e kombershon di Evan. El a lanta den un kas ku tabata teme Dios i a brasa Skritura i Hesus for di un edat chikí. Sinembargo, ora Evan a bira un hóben adulto, el a haña su mes mas i mas desafiá pa pone su fé den akshon. Eventualmente el a bira un estudiante na e skol sekundario na Newcastle Emlyn, Wales, promé ku el a risibí entrenamentu ministerial na Trefecca College.

Dia 29 di sèptèmber 1903, Evan a asistí na un reunion di orashon na Blaenannerch Chapel. El a resa fervorosamente pa Dios "moldí'è", i Roberts a sinti su Dios kontestá. Un tiki mas ku un luna despues, Evan Roberts, despues di a bandoná su estudio ministerial pa bai kas i prediká, a kuminsá un seri di reunion na Moriah Chapel na Loughor, Wales.

Loke a sosodé despues por wòrdu atribuí solamente na e moveshon di Dios. Un reavivamentu a kuminsá na Wales, asina ku Evan Roberts tin biaha mester a bai di un kapèl pa otro riba e mesun dia, predikando mientras e kongregashonnan tabata resa ku arepentimentu. E salonnan, konosí komo "kasnan públiko", a keda sin kliente. Mamanan i tatanan tabata kuida nan yu en bes di pèrmití nan mes hasi nan mal kustumbenan. Asta e "pony di pos" a sinti un kambio den e manera kon e mineronan, ku awor tabata traha mas laborioso, tabata trata e bestianan di karga aki. Por lo ménos 100.000 hende a yega na un konosementu salvador di Dios durante e periodo ei na Wales.

Tur e esfuerso pa prediká ku Roberts tabata hasi a pone un peso riba su kurpa, i su salú a kai den otro na aña 1906. Mientras ku e tabata den rekuperashon, Roberts a enfoká su atenshon riba interseshon, tin biaha resando te ku 18 ora pa dia. Eventualmente el a bolbe na Wales i a fayesé na aña 1951.

E historia di e Reavivamentu di Wales no solamente a plama rònt mundu, pero tambe Wales a manda mishonero na hopi tera den ekterior. Evan Roberts su desishon pa buska Dios sinseramente tabatin un gran impakto riba un nashon chikitu!

**REFLEKSHON:** E poder di orashon ta kisas e rekurso mas grandi ku no a wòrdu eksplotá riba e planeta aki. Bo ta resando pa e direkshon di Dios den bo bida i pa Su toke den bo komunidad?

<https://www.amazingfacts.org/bible-study/daily-devotional>